

白虎通義



白虎通義卷三

扶風班固孟堅撰

封禪

王者易姓而起必升封泰山何教告之義也始受命之時
改制應天下太平功成封禪以告太平也所以必於泰
山何萬物所交代之處也必於其上何因高告高順其類
也故升封者增高也下禪梁甫之山基廣厚也刻石紀號
者著已之功跡也以自效倣也天以高爲尊地以厚爲德
故增泰山之高以放天附梁甫之基以報地明天地之所
命功成事遂有益於天地若高者加高厚者加厚矣或曰

封者金泥銀繩或曰石泥金繩封以印璽故孔子曰升泰山觀易姓之王可得而數者七十有餘封者廣也言禪者明以成功相傳也梁甫者泰山旁山名正以梁甫何以三皇禪於繹繹之山明已成功而去有德者居之繹繹者無窮之意也五帝禪于亭亭者制度審諦德著明也三王禪于梁甫之山者梁信也甫輔也輔天地之道而行之也太平乃封知告于天必也於岱宗何明知易姓也刻石紀號知自紀于百王也燎祭天報之義也望祭山川祀羣神也詩云於皇時周陟其高山言周太平封泰山也又曰墮山喬嶽允猶翕河言望祭山川百神來歸也天下太平符瑞

所以來至者以爲王者承統理調和陰陽陰陽和萬物序
休氣充塞故符瑞竝臻皆應德而至德至天則斗極明日
月光甘露降德至地則嘉禾生蓂莢起秬鬯出太平感德
至文表則景星見五緯順軌德至草木朱草生木連理德
至鳥獸則鳳凰翔鸞鳥舞麒麟臻白虎到狐九尾白雉降
白鹿見白鳥下德至山陵則景雲出芝實茂陵出異丹阜
出萑莆山出器車澤出神鼎德至淵泉則黃龍見醴泉通
河出龍圖洛出龜書江出大貝海出明珠德至八方則祥
風至佳氣時喜鍾律調音度施四夷化越裳貢孝道至則
以萑莆者樹名也其葉大於門扇不搖自扇於飲食清涼

助供養也繼嗣平明則賓連生於房戶賓連者木名連累相承故在於房戶象繼嗣也日曆得其分度則蓂莢生於階閒蓂莢樹名也月一日生一莢十五日畢至十六日去莢故夾階生似日月也賢不肖位不相踰則平路生於庭平路者樹名也官位得其人則生失其人則死狐九尾何狐死首邱不忘本也明安不忘危也必九尾者何九妃得其所子孫繁息也於尾者何明後當盛也景星者大星也月或不見景星常見可以夜作有益於人民也甘露者美露也降則物無不盛者也朱草者赤草也可以染絳別尊卑也醴泉者美泉也狀若醴酒可以養老嘉禾者大禾也

成王時有三苗異畝而生同爲一穗大幾盈車長幾充箱
民有得而上之者成王訪周公而問之公曰三苗爲一穗
天下共和爲一乎以是果有越裳氏重九譯而來矣

巡狩

王者所以巡狩者何巡者循也狩牧也爲天下循行守牧
民也道德太平恐遠近不同化幽隱自不得所考禮義正
法度同律曆計時月皆爲民也尙書曰遂覲東后叶時月
正日同律度量衡修五禮尙書大傳曰見諸侯問百年太
師陳詩以觀民命風俗命市納賈以觀民好惡山川神祇
有不舉者爲不敬不敬者削以地宗廟有不順者爲不孝

不孝者黜以爵變禮易樂爲不從不從者君流改衣服制
度爲畔畔者君討有功者賞之尙書曰明試以功車服以
庸巡狩所以四時出何當承宗廟故不踰時也以夏之仲
月者同律度當得其中也二月八月晝夜分五月十一月
陰陽終尙書曰二月東巡狩至于岱宗柴五月南巡狩至
于南嶽八月西巡狩至于西嶽十有一月朔巡狩至于北
嶽所以五歲巡狩何爲太煩也過五年爲太疎也因天道
時有所生歲有所成三歲一閏天道小備五歲再閏天道
大備故五歲一巡狩三年小備二伯出述職黜陟一年物
有終始歲有所成方伯行國時有所生諸侯行邑傳曰周

公入爲三公出爲二伯中分天下出黜陟詩云周公東征四國是皇言東征述職周公黜陟而天下皆正也又曰蔽芾甘棠勿翦勿伐召伯所茇言召公述職親說舍於野樹之下也春秋穀梁傳曰古之君民以時視民之勤巡狩祭天何本巡狩爲祭天告至尙書曰東巡狩至于岱宗柴也王者出必告廟何孝子出辭反面事死如事生尙書歸假于祖禰曾子問曰王者諸侯出親告祖禰使祝遍告五廟尊親也王者將出告天者示不專也故王制曰類于上帝宜乎社造于禰類祭以祖配不曰接者尊無二禮尊尊之義造于禰獨見禰何辭從卑不復留尊者之命至禰不謙

不至祖卽祭告天爲告事也祖爲出辭也義異告于尊者
然後乃辭出王者諸侯出必將主何示有所尊故曾子曰
王者將出必以遷廟主行載于齋車示有尊也無遷主以
幣帛主告于祖禰廟遂奉以出每舍奠焉蓋貴命也必以
遷主者明廟不可空也王者巡狩諸侯待于境者何諸侯
以守蕃爲職也禮祭義曰天子巡狩諸侯待于境也王者
巡狩必舍諸侯祖廟何明尊無二上也故禮坊記曰君適
其臣升自阼階示不敢有其室也禮曰天子適諸侯必舍
其祖廟王者出一公以其屬守二公以其屬從也王者巡
狩崩于道歸葬何夫太子當爲喪主天下皆來奔喪京師

四方之中也。卽如是舜葬蒼梧禹葬會稽于時尙質故死則止葬不重煩擾也。何以知太平乃巡狩以武王不巡狩至成王乃巡狩嶽者何謂也。嶽之爲言桶桶功德東方爲岱宗者言萬物更相代於東方也。南方霍山者霍之爲言護也。言萬物護也。太陽用事護養萬物也。西方爲華山者華之爲言穫也。言萬物成熟可得穫也。北方爲恆山恆者常也。萬物伏藏於北方有常也。中央爲嵩山言其後大之也。故尙書大傳曰五嶽謂岱山霍山華山恆山嵩山也。謂之瀆河瀆者濁也。中國垢濁發源東注海其功著大故稱瀆也。爾雅云江河淮濟爲四瀆也。

攷黜

諸侯所以考黜何王者所以勉賢抑惡重民之至也尙書
曰三載考績三考黜陟禮說九錫卓馬衣服樂朱戶納陛
虎賁鈇鉞弓矢鉅鬯皆隨其德可行而賜車馬能安民者
賜衣服能使民和樂者賜以樂民衆多者賜以朱戶能進
善者賜以納陛能退惡者賜以虎賁能除有罪者賜以鈇
鉞能征不義者賜以弓矢孝道備者賜以鉅鬯以先後與
施行之次自不相踰相爲本末然安民然後富貴而後樂
樂而後衆乃多賢賢乃能進善進善乃能退惡退惡乃能
斷刑內能正己外能正人內外行備孝道乃生能安民故

賜車馬以著其功德安其身能使人富足衣食倉廩實故
賜衣服以彰其體能使民和樂故賜之樂以事其先也禮
曰夫賜樂者不得以時王之樂事其宗廟也朱盛色戶所
以紀民數也故民衆多賜朱戶也古者人君下賢降階一
等而禮之故進賢賜之納陛以優之也既能進善當能戒
惡故使虎賁虎賁者所以戒不虞而距惡距惡而斷刑故
賜之鈇鉞鈇鉞所以斷大刑刑罰既中則能征不義故賜
弓矢弓矢所以征不義伐無道也圭瓚鉅鬯宗廟之盛禮
故孝道備而賜之鉅鬯所以極著孝道孝道純備故內和
外榮玉以象德金以配情芬香條鬯以通神靈玉飾其本

君子之性金飾其中君子之道君子有黃中通理之道美素德金者精和之至也玉者德美之至也鬯者芬香之至也君子有玉瓚鉅鬯乎車者以配道德也其至矣合天下之極美以通其志也其唯玉瓚鉅鬯乎車者謂有赤有青之蓋朱輪特能居前左右寢米庶也以其進止有節德綏民路車乘馬以安其身言成章行成規卷龍之衣服表顯其德長於教誨內懷至仁則賜時王樂以化其民尊賢達德動作有禮賜之納陞以安其體居處修治房內節男女時配貴賤有別則賜朱戶以明其德列威武有矜嚴仁堅強賜以虎賁以備非常喜怒有節誅罰刑賜以鈇鉞使得

專殺好惡無私執義不傾賜以弓矢使得專征孝道之美
百行之本也故賜以玉瓚得專爲賜也故王制曰賜之弓
矢然後專殺又曰賜圭瓚然後爲暢未賜者資暢於天子
王度記曰天子鬯諸侯薰大夫芑蘭士蒹庶人艾車馬衣
服樂三等者賜與其物禮天子賜諸侯民服車路先設路
下四惡之又曰諸公奉選服王制曰天子賜諸侯樂則以
祝將之詩曰君子來朝何錫與之雖無與之路車乘馬又
何以與之玄衮及黼書曰明試以功車服以庸朱戶納陛
虎賁者皆與之制度而鈇鉞弓矢玉瓚皆與之物各因其
宜也柅者黑黍一稌二米鬯者以百草之香鬱金合而釀

之成爲鬯陽達於牆屋入于淵泉所以灌地降神也玉瓚者器名也所以灌鬯之器也以圭飾其柄灌鬯貴玉器也所以三歲一考績何三年有成故於是賞有功黜不肖尙書曰三載考績三考黜陟何以知始考輒黜之尙書曰三年一考少黜以地書所言三考黜者謂爵土異也小國考之有功增土進爵後考無功削黜後考有功上而賜之矣五十里不過五賜而進爵土七十里不過七賜而進爵土能有小大行有進退也一說盛德始封百里者賜三等得征伐專殺斷獄七十里伯始封賜二等至虎賁百人後有功賜弓矢復有功賜鉅鬯增爵爲侯益土百里復有功入

爲三公五十里子男始封賜一等至樂復有功稍賜至虎
賁賜爵爲伯復有功稍賜至秬鬯增爵爲侯未賜鈇鉞者
從大國連率方伯而斷獄受命之王致太平之主美羣臣
上下之功故盡封之及中興征伐大功皆封所以著大功
盛德之士亦封之所以尊有德也以德封者必試之爲附
庸三年有功因而封五十里元士有功者亦爲附庸世其
位大夫有功成封五十里卿功成封七十里公功成封百
里士有功德遷爲大夫大夫有功德遷爲卿卿有功德遷
爲公故爵主有德封主有功也諸侯有九賜習其賜者何
子之能否未可知也或曰得之但未得行其習以專也三

年有功則皆得用之矣二考無功則削其地而賜自并知明本非其身所得也身得之者得以賜當稍黜之爵所以封賢也三公功成當封而死得立其子爲附庸賢者之體能有一也不二矣一削爲七十里侯再削爲七十里伯三削爲寄公七十里伯一削爲五十里伯二削爲五十里子三削地盡五十里子一削爲三十里子再削爲三十里男三削地盡五十里男一削爲三十里男再削爲三十里附庸三削爵盡所以至三削何禮成於三三三而不改雖反無益也尙書曰三考黜陟先削地後黜爵者何爵者尊號也地者人所任也今不能治廣土衆民故先削其土地也